



Broj: 01-189 /11
Vareš, 27.10. 2011. godine

Z A P I S N I K
s 31. sjednice Općinskog vijeća Vareš,
održane 27.09. 2011. godine

Josip Malbašić – predsjedavajući Općinskog vijeća Vareš, otvorio je 31. sjednicu s početkom u 9,00 sati, u velikoj sali Općine Vareš.

Predsjedavajući OV pozvao je Nihada Parića kojem je CIK BiH dodijelila mandat, da sukladno sa Poslovníkom o radu OV, da svečanu izjavu.

Nihad Parić dao je i potpisao svečanu izjavu, a predsjedavajući OV čestitao mu je u svoje osobno ime i u ime Općinskog vijeća Vareš i zaželio mu uspješan rad.

Izvršena je prozivka vijećnika.

Prisutni vijećnici: Ismet Abdulahović, Dženana Bešić, Tajiba Brkić, Dženana Hafizović, Izudin Ibrišimović, Kenan Kamenjaš, Džemo Kevrić, Milan Knežević, Ešref Likić, Ivan Lučić, Josip Malbašić, Željko Matić, Mario Mirčić, Majda Muftić, Nihad Parić, Mato Pavić, Elvir Rožajac, Jasmin Salketić, Dragan Sekulić, Nikola Šimić i Jelena Zlobec.

Odsutni: Nema

Pored vijećnika sjednici prisustvuju: Općinski načelnik Hamdo Fatić, tajnik Općinskog vijeća Leon Pavlović, pomoćnici općinskog načelnika, šef Odsjeka za financije Boro Anđić, predsjednici političkih stranaka, poslanik u Skupštini ZDK Fahrudin Brkić, predstavnic OSCE Terenski ured Zenica Mirhunisa Bektaš, ispred Radne grupe za provođenje trogodišnjeg Općinskog akcijskog plana Brano Šurkić i Nikola Jačimovski, predsjednik MZ Neprivaj Cigura Kasim i predsjednik MZ Vareš Enver Fetišević.

Tajnik Općinskog vijeća izvijestio je Vijeće o realizaciji Zaključaka s 30. sjednice OV održane 30. 06 i 28.07.2011. godine i dostavljenim odgovorima na vijećnička pitanja. Općinsko vijeće na 30. sjednici donijelo je 10 Zaključaka. Od tog broja 5 Zaključaka je realizirano, a 5 Zaključka su u toku realizacije. Na 30. sjednici OV postavljeno je 7 vijećničkih pitanja, na 3 pitanja nadležne službe su u pisanoj formi dostavile odgovore podnosiocima pitanja, a na 4 postavljena vijećnička pitanja, Služba OV nije dobila odgovore.

Općinski načelnik Hamdo Fatić u okviru aktualne problematike na području općine Vareš upoznao je Vijeće o završenim projektima i to: put za Pomeniče (MZ Dabravine), put za Borovicu, dio puta na Pogari prema Dubošćici, put za Očeviju i put u Mižnovićima. U toku su radovi na regionalnom putu na tri lokacije: Pajtov Han (100.000 KM), tunel gdje je izvođač radova JKP d.o.o. Vareš i radovi do Ivančeva (450.000 KM). Također su u toku radovi na rekonstrukciji škole u MZ Dragovići. U vezi projekta ODRAZ – asfaltiranje i rekonstrukcija ulica, izvijestio je Vijeće, da će se radovi završiti u narednih 15-20 dana. Radovi na vodovodima Neprivaj, Maćak i Zubeta su pri kraju. Radovi na rješavanju problema u vezi javne rasvjete u naselju Selište još nisu završeni, razlozi su ti što je projekat javne rasvjete dobiven prije sedam dana i nedostatak je novčanih sredstava. Općinski

načelnik dao je obećanje da će u najskorije vrijeme zajedno sa Elektrodistribucijom Vareš završiti ovaj projekat.

(Vijećnička pitanja)

Ismet Abdulahović

1. Podsjetio je da je na prošloj sjednici OV postavio dva pitanja i da ni na jedan nije dobio odgovor. Pitanja su se odnosila na rješavanje problema sa psima lualicama i rješavanje problema u vezi mjesnog greblja u MZ Dabravine.
Općinski načelnik Hamdo Fatić usmeno je dao odgovor da se problem u vezi pasa lualica rješava, a da se rješavanje problema u vezi greblja u MZ Dabravine još uvijek traži i pozvao je i mještane MZ Dabravine da povećaju svoju aktivnost u vezi ovog problema i da isti zajedno pokušaju riješiti.
2. Podsjetio je na pitanje koje je postavio na sjednici OV prije godinu dana u vezi postavljenja snjegobrana i gromobrana na područnoj školi u MZ Dabravine, naglasio je da isti još uvijek nisu postavljeni. Traži da se taj problem riješi?
3. Traži od Općinskog načelnika i nadležne Službe da mu se odgovori da li se plaća koncesija na vodovod za općinu Breza koji je sa područja općine Vareš, koliki je iznos koji se plaća, a ako se ne plaća, zašto se ne plaća?

Elvir Rožajac

4. Zašto se ni jednom plato pijace nije oprao poslije pazarnog dana (subotom)?
5. Zašto je najugroženiji zaseok Kosići izostavljen iz projekta dovođenja vode sa vodovoda Mačak i koliko je sredstava finansirano za vodovod Mačak?

Džemo Kevrić

6. Dao je komentar na odgovor koji je dobio na postavljeno pitanje na prošloj sjednici OV, u vezi realizacije sanacije lokalnih puteva poslije zimskog održavanja na području općine Vareš. Traži da se na lokalnom putu MZ Striježevo izvrši uklanjanje niskog rastinja, čišćenje kanala i da se sa sanacijom krene što prije?
7. U ime mještana MZ Kokošćići traži da mu se pismeno odgovori kako i na koji način se omogućilo dalje upravljanje vodom u MZ Kokošćići, tj. daje se voda u drugu općinu? Napominje da je pismeni odgovor potrebno proslijediti i mještanima MZ Kokošćići.

Jelena Zlobec

8. Podsjetila je na pitanje koje je postavila na jednoj od ranijih sjednica OV u vezi sanacije stepeništa u Vareš Majdanu ul. Josipa Čupke. Napominje da je obećano da će se nastaviti sa sanacijom stepeništa. Naglašava da je stepenište u vrlo lošem stanju i traži da se nešto poduzme po tom pitanju?

Tajiba Brkić

9. Što je sa rasvjetom u ostalim Mjesnim zajednicama i da li će se nastaviti daljnji radovi?

10. Da li postoji mogućnost da se asfaltira ulica prema gradskom greblju Glavica u Varešu?

Ivan Lučić

11. Podsjetio je na Inicijativu koju je pokrenuo na jednoj od ranijih sjednica OV u vezi izrade Odluke, odnosno provođenju Zakona o zaštiti od požara i vatrogastvu, da se izradi Odluka o dimnjačarskoj službi. Vijeće je donijelo Zaključak i odredilo rok, ali još uvijek Vijeće nije dobilo Odluku ni u Nacrtu. U skladu sa Poslovníkom o radu OV, traži da mu se usmeno odgovori odmah na sjednici.
Općinski načelnik Hamdo Fatić u vezi postavljenog pitanja, izjasnio se da će vijećnik Ivan Lučić od nadležnih, dobiti pismeni odgovor.

Ešref Likić

12. Ima li ikakav projekat asfaltiranja puta Stupni Do-Lipa-Bijelo Borje-Podtisovci?

Predsjedavajući OV stavio je na raspravu zapisnik sa 30. sjednice OV .

Nije bilo primjedbi i predsjedavajući OV stavio je na izjašnjanje zapisnik sa 30. sjednice OV i nakon izjašnjanja vijećnika konstatirao da je **zapisnik sa 30. sjednice OV jednoglasno usvojen.**

Na raspravu je stavljen prijedlog dnevnog reda iz poziva za 31. sjednicu OV.

Nije bilo primjedbi ni prijedloga za izmjenu ili dopunu dnevnog reda 31. sjednice OV.

Predsjedavajući OV stavio je na izjašnjanje prijedlog dnevnog reda iz poziva za 31. sjednicu OV i nakon izjašnjanja konstatira da je **jednoglasno usvojen s l i j e d e ć i**

Dnevni red

1. **Izvješće/Izvještaj o izvršenju Općinskog proračuna/budžeta za period I-VI 2011. godine.**
2. **Prijedlog Odluke o nerazvrstanim cestama.**
3. **Prijedlog Odluke o dopunama Odluke o standardima komunalnih usluga.**
4. **Prijedlog Odluke o povjeravanju na upravljanje i korištenje vodovoda pitke vode za naselje Neprivaj sa izvorišta „Studenac“ JKP d.o.o. Vareš.**
5. **Prijedlog Odluke o izmjenama Odluke o usklađivanju statusa JP „Vareš-stan“ d.o.o. Vareš sa Zakonom o javnim poduzećima u FBiH i Zakonom o privrednim društvima.**
6. **Nacrt Odluke o izmjenama i dopunama Odluke o kriterijima za dodjelu stipendija redovnim studentima.**
7. **Izvješće o realizaciji Programa rada Općinskog vijeća Vareš za prvo polugodište 2011. godine.**
8. **Izvješće o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.**
9. **Izvješće o stanju lokalne i regionalne putne mreže na području općine Vareš.**
10. **Informacija o vodoopskrbi i odvozu smeća na području općine Vareš i održavanju javnih površina.**
11. **Informacija o primjeni Etičkog kodeksa izabranih dužnosnika općine Vareš.**

12. Tekuća pitanja

Ad. 1.

(Izvešće/Izveštaj o izvršenju Općinskog proračuna/budžeta za period I-VI 2011. godine.)

Komisija za gospodarstvo, financije i proračun, na sjednici održanoj 20.09.2011. godine, jednoglasno je donijela Zaključak: Komisija nema primjedbi na Izvešće/Izveštaj o izvršenju Općinskog proračuna/budžeta za period I-VI 2011. godine i predlaže Općinskom vijeću da isti usvoji.

Predlagač Općinski načelnik dao je kratko objašnjenje.

Ispred predlagača Boro Anđić šef Odsjeka za financije skrenuo je pažnju Vijeću na tehničku grešku u Izveštaju na str. 12. Dao je i dodatno objašnjenje za ovu točku dnevnog reda.

Otvorena je rasprava u kojoj su učestvovali vijećnici: Elvir Rožajac, Džemo Kevrić, Dženana Bešić i pomoćnik načelnika Zihinja Krnjić koji je odgovorio na postavljena pitanja vijećnika u raspravi.

Zaključena je rasprava i predsjedavajući OV stavio je na izjašnjavanje Izvešće/Izveštaj o izvršenju proračuna/budžeta Općine Vareš za period I-VI 2011. godine.

Nakon izjašnjavanja vijećnika, predsjedavajući OV je konstatirao da je sa **12 glasova „ZA“, 6 glasova „PROTIV“ i 2 „SUZDRŽANA“ glasa usvojeno**

(Izvešće/Izveštaj o izvršenju Općinskog proračuna/budžeta za period I-VI 2011. godine.)

Ad. 2.

(Prijedlog Odluke o nerazvrstanim cestama.)

Predlagač nije imao potrebe za dodatnim obrazloženjem.

Nije bilo rasprave po ovoj točki dnevnog reda i predsjedavajući OV stavio je na izjašnjavanje Prijedlog Odluke o nerazvrstanim cestama.

Nakon izjašnjavanja vijećnika predsjedavajući OV je konstatirao da je sa **20 glasova „ZA“ usvojena**

Odluka o nerazvrstanim cestama.

Ad. 3.

(Prijedlog Odluke o dopunama Odluke o standardima komunalnih usluga.)

Ispred predlagača Ermin Musa podsjetio je Vijeće da je predlagač prihvatio primjedbe Komisije za statutarne pitanja i propise i predložene amandmane vijećnika Ivana Lučića, čime su oni postali sastavni dio Odluke.

Otvorena je rasprava u kojoj su svoje primjedbe i sugestije iznijeli vijećnici: Elvir Rožajac (u vezi održavanja-pranja platoa gradske pijace) i Ivan Lučić koji je imao primjedbu na tekstualni dio predloženog amandmana u vezi definiranja veličine četke za čišćenje dimnjaka.

Ermin Musa ispred predlagača izjasnio se da prihvata primjedbu vijećnika Ivana Lučića, a u vezi prijedloga vijećnika Elvira Rožajca, poslije objašnjenja koje je dao vijećnik Ivan Lučić u vezi

održavanja platoa pijace, konstatirano je da je to u Odluci već navedeno u tekstu gdje se navodi održavanje pijace u skladu sa pijačnim redom.

Zaključena je rasprava i predsjedavajući OV stavio je na izjašnjanje Prijedlog Odluke o dopunama Odluke o standardima komunalnih usluga.

Nakon izjašnjanja vijećnika predsjedavajući OV je konstatirao da je **sa 20 glasova „ZA“ usvojena**

***Odluka o dopunama Odluke
o standardima komunalnih usluga.***

Ad. 4.

*(Prijedlog Odluke o povjeravanju na upravljanje
i korištenje vodovoda pitke vode za naselje
Neprivaj sa izvorišta „Studenac“ JKP d.o.o. Vareš.)*

Komisija za statutarna pitanja i propise nije imala primjedbi na Prijedlog Odluke o povjeravanju na upravljanje i korištenje vodovoda pitke vode za naselje Neprivaj sa izvorišta „Studenac“ JKP d.o.o. Vareš.

Ispred predlagač Ermin Musa dao je kratko objašnjenje za ovu točku dnevnog reda.

Otvorena je rasprava u kojoj su iznijeli svoje primjedbe, prijedloge i sugestije vijećnici: Elvir Rožajac, Nihad Parić, Džemo Kevrić, Tajiba Brkić, Ivan Lučić, Općinski načelnik Hamdo Fatić, predsjedavajući OV Josip Malbačić, Ermin Musa koji je ispred predlagača odgovorio na postavljeno pitanje u raspravi u vezi visine uloženi sredstava u vodovod za naselje Neprivaj i predsjednik MZ Neprivaj Cigura Kasim koji je izrazio zadovoljstvo u vezi vodovoda i ostalih radova koji su urađeni u MZ Neprivaj i ujedno se zahvalio Općinskom načelniku i općinskim Službama u pomoći pri realiziranju projekata u MZ Neprivaj.

Zaključena je rasprava i predsjedavajući OV stavio je na izjašnjanje Prijedlog odluke o povjeravanju na upravljanje i korištenje vodovoda pitke vode za naselje Neprivaj sa izvorišta „Studenac“ JKP d.o.o. Vareš.

Nakon izjašnjanja vijećnika predsjedavajući OV je konstatirao da je **sa 15 glasova „ZA“ i 5 „SUZDRŽANIH“ glasova usvojena**

***Odluka o povjeravanju na upravljanje
i korištenje vodovoda pitke vode za naselje
Neprivaj sa izvorišta „Studenac“ JKP d.o.o. Vareš.***

Ad. 5.

*(Prijedlog Odluke o izmjenama Odluke o
usklađivanju statusa JP „Vareš-stan“ d.o.o. Vareš
sa Zakonom o javnim poduzećima u FBiH i
Zakonom o privrednim društvima.)*

Komisija za statutarna pitanja i propise na sjednici održanoj 20.09. 2011. godine jednoglasno je donijela Zaključak: Komisija nema primjedbi, ali predlaže da se u preambuli prijedloga Odluke, pored ostalih navedenih brojeva Sl. novina FBiH, navedu i brojevi 88/08, 7/09 i 63/10.

Predlagač nije imao dodatno obrazloženje za ovu tačku dnevnog reda, izjasnio se da predlagač prihvata prijedlog Komisije za statutarna pitanja i propise čime oni postaju sastavni dio Odluke.

Nije bilo rasprave po ovoj točki dnevnog reda i predsjedavajući OV stavio je na izjašnjanje Prijedlog Odluke o izmjenama Odluke o usklađivanju statusa JP „Vareš-stan“ d.o.o. Vareš sa Zakonom o javnim poduzećima u FBiH i Zakonom o privrednim društvima.

Nakon izjašnjavanja vijećnika predsjedavajući OV konstatira da je sa **20 glasova „ZA“ usvojena**

***Odluka o izmjenama Odluke o
usklađivanju statusa JP „Vareš-stan“ d.o.o.
Vareš sa Zakonom o javnim poduzećima
u FBiH i Zakonom o privrednim društvima..***

Ad. 6.

*(Nacrt Odluke o izmjenama i dopunama Odluke
o kriterijima za dodjelu stipendija redovnim studentima.)*

Komisija za statutarna pitanja i propise na sjednici održanoj 20.09. 2011. godine nije imala primjedbi na Nacrt Odluke o izmjenama i dopunama Odluke o kriterijima za dodjelu stipendija redovnim studentima.

Predlađač nije imao dodatno obrazloženje za ovu tačku dnevnog reda.

Otvorena je rasprava u kojoj su svoje prijedloge i mišljenja iznijeli vijećnici: Dženana Hafizović i Dženana Bešić.

Zaključena je rasprava i predsjedavajući OV predložio je slijedeći

Zaključak:

- **Predloženi Nacrt Odluke o izmjenama i dopunama Odluke o kriterijima za dodjelu stipendija redovnim studentima i prijedlozi iz rasprave na današnjoj sjednici predstavljaju dobru osnovu za izradu Prijedloga Odluke, te se predlaže da se u narednih mjesec dana održi javna rasprava a potom utvrdi konačan Prijedlog Odluke za jednu od narednih sjednica OV.**

Predsjedavajući OV stavio je na izjašnjavanje predloženi prijedlog Zaključka, te nakon izjašnjavanja vijećnika konstatira da je **predloženi Zaključak sa 19 glasova „ZA“ usvojen.**

Ad. 7.

*(Izvešće o realizaciji Programa rada Općinskog
vijeća Vareš za prvo polugodište 2011. godine.)*

Sekretar Općinskog vijeća Leon Pavlović dao je obrazloženje za ovu tačku dnevnog reda i pozvao je Vijeće da se izjasni o predloženim zaključcima iz Izveštaja i ako neko ima dopuna ili prijedloga, da ih iznese u raspravi po ovoj tački dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Izveštaj o realizaciji Programa rada Općinskog vijeća Vareš za prvo polugodište 2011. godine sa predloženim zaključcima u Izveštaju.

Nakon izjašnjavanja vijećnika predsjedavajući OV konstatira da je sa **19 glasova „ZA“ usvojeno**

***Izvešće o realizaciji Programa rada Općinskog
vijeća Vareš za prvo polugodište 2011. godine.***

Ad. 8.

(Izvješće o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.)

Predlagač nije imao dodatno obrazloženje za ovu točku dnevnog reda,

Otvorena je rasprava u kojoj je svoje primjedbe i sugestije iznijeli vijećnici: Elvir Rožajac i Ismet Abdulahović.

Zaključena je rasprava i predsjedavajući OV stavio je na izjašnjavanje Izvještaj o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.

Nakon izjašnjavanja vijećnika predsjedavajući OV je konstatovao da je sa **19 glasova „ZA“ i 1 „SUZDRŽANIM“ glasom usvojen**

Izvještaj o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.

Ad. 9.

(Izvješće o stanju lokalne i regionalne putne mreže na području općine Vareš.)

Predlagač nije imao dodatno obrazloženje za ovu točku dnevnog reda,

Nije bilo rasprave po ovoj točki dnevnog reda i predsjedavajući OV stavio je na izjašnjavanje Izvještaj o stanju lokalne i regionalne putne mreže na području općine Vareš.

Nakon izjašnjavanja vijećnika predsjedavajući OV je konstatirao da je sa **19 glasova „ZA“ i 1 „SUZDRŽANIM“ glasom usvojeno**

Izvješće o stanju lokalne i regionalne putne mreže na području općine Vareš.

Ad.10.

(Informacija o vodoopskrbi i odvozu smeća na području općine Vareš i održavanju javnih površina.)

Predlagač nije imao dodatno obrazloženje za ovu točku dnevnog reda,

Otvorena je rasprava u kojoj je svoje primjedbe i sugestije iznijeli vijećnici: Elvir Rožajac, Jasmin Salketić, Ismet Abdulahović, Dženana Bešić, Ivan Lučić, Džemo Kevrić, sekretar OV Leon Pavlović i predsjedavajući OV Josip Malbašić.

Zaključena je rasprava i predsjedavajući OV predložio je da se predložena Informacija o vodoopskrbi i odvozu smeća na području općine Vareš i održavanju javnih površina usvoji uz slijedeći

Zaključak:

- **Obavezuje se Općinski načelnik i nadležne Službe da do 01.11. 2011. godine. pripreme prijedlog rješavanja problema odlagališta – deponije otpada „Kota“ Vareš.**

Nakon izjašnjavanja vijećnika predsjedavajući OV je konstatirao da je sa **17 glasova „ZA“ i 3 „SUZDRŽANA“ glasa usvojen Zaključak i**

Informacija o vodoopskrbi i odvozu smeća na području općine Vareš i održavanju javnih površina.

Ad.11.

(Informacija o primjeni Etičkog kodeksa izabраних dužnosnika općine Vareš.)

Predlagač nije imao dodatno obrazloženje za ovu točku dnevnog reda,

Otvorena je rasprava u kojoj je učestvovao vijećnik Elvir Rožajac.

Zaključena je rasprava i predsjedavajući OV stavio je na izjašnjavanje Informaciju o primjeni Etičkog kodeksa izabраних dužnosnika općine Vareš.

Nakon izjašnjavanja vijećnika predsjedavajući OV je konstatirao da je sa **20 glasova „ZA“ usvojena**

Informacija o primjeni Etičkog kodeksa izabраних dužnosnika općine Vareš.

Ad. 12.

(Tekuća pitanja.)

1. Predsjedavajući OV izvjestio je prisutne da su se Općinskom vijeću Vareš obratili uposlenici Općine Vareš Mersin Brkić i Mevla Alić sa zahtjevom za obračun plaće u skladu sa Zakonom. Njihov zahtjev upućen je i Općinskom načelniku. Predsjedavajući OV upoznao je Vijeće sa sadržajem Zahtjeva i očitovanjem po istom od strane Općinskog načelnika. Otvorena je rasprava u kojoj su učestvovali vijećnici: Elvir Rožajac, Ismet Abdulahović, Dženana Bešić, Ivan Lučić i Općinski načelnik koji je dao objašnjenje u vezi diskusije vođene u raspravi i odgovorio na neka pitanja postavljena u raspravi. Zaključena je rasprava i predsjedavajući OV predložio je slijedeći

Zaključak:

- **Obavezuje se Općinski načelnik da do kraja tekuće godine uskladi poslovanje i odnose u organu uprave sa zakonskim propisima, te da se pristupi izradi i donošenju adekvatnih pravilnika (Pravilnih o sistematizaciji radnih mjesta u organu uprave i Pravilnik o plaćama državnih službenika i namještenika u organu uprave Općine Vareš).**

Nakon izjašnjavanja vijećnika predsjedavajući OV je konstatirao da je sa **21 glasom „ZA“ usvojen predloženi Zaključak.**

2. Predsjedavajući OV upoznao je prisutne da je Općinskom vijeću Vareš upućen dopis-obavijest od strane MZ Ravne u kome se Vijeće obavještava da se vrši priprema za sječu šume od strane JP „ŠPD ZDK“ u vodozaštitnom području izvorišta „Očevija“ i vrela „Zubeta“ i „Ravne“ iz kojih se vrši snabdijevanje vodom grad Vareš, te naseljena mjesta Zubeta, Ravne i Budoželje sa ukupno cca 8.000 stanovnika. Obavijest je dostavljena i Federalnom ministarstvu šumarstva, poljoprivrede i vodoprivrede i Kantonalnoj upravi za inspeksijske poslove – insp. za šumarstvo ZDK. Općinski načelnik izvjestio je Vijeće da je u vezi ovog problema odmah reagirao.

Obavijestio je kantonalnog šumarskog inspektora koji je došao i od koga je zatraženo da u skladu sa Zakonom, Šumsko-privrednom osnovom i intenzitetom sječe šume, obrati pažnju na projekte za sječu koji slijede. Općinski načelnik je napomenuo da još nema povratne informacije od strane kantonalnog šumarskog inspektora i naglašava da se nada da neće biti prekoračenja sječe šume ni ulaska u vodozaštitne zone.

U raspravi su učestvovali vijećnici: Ivan Lučić i Elvir Rožajac, te Fahrudin Brkić kao rukovodilac PJ Šumarija Vareš.

Predsjedavajući OV, na osnovu sprovedene rasprave, predložio je slijedeće

Zaključke:

- **Obavezuje se Općinski načelnik i JKP d.o.o. Vareš koje upravlja vodovodima na području gdje se očekuje sječa šume, da u narednom periodu budu u stalnom kontaktu i vrše stalni nadzor da li se sječa odvija u skladu sa propisima o zaštitnim zonama i uvjetima koje one proizvode.**
- **Obavezuje se Općinski načelnik i Uprava PJ Šumarije Vareš da u kontaktu sa stanovništvom MZ Ravne nađu rješenje i za sječu njihovog ogrjevnog drveta.**

Predsjedavajući OV stavio je na izjašnjavanje predložene zaključke, te nakon izjašnjavanja vijećnika konstatira da su **predloženi Zaključci jednoglasno usvojeni**.

3. Predsjedavajući OV upoznao je prisutne da je Općinskom vijeću Vareš upućen dopis od strane Mije Batvić ul Kota br. 3 Vareš i ostalih korisnika ulice Kota, u kome traže da se izvrši sanacija dijela puta ulice Kota u dužini 120 m, koji je dijelom uništen radovima BH Telekoma, a dijelom zbog višegodišnjeg neodržavanja od strane općinskih Službi nadležnih za održavanje istih.
Općinski načelnik u svom obraćanju izvijestio je Općinsko vijeće da će ovaj problem riješiti vrlo brzo.

Predsjedavajući OV predložio je slijedeći

Zaključak:

- **Obavezuje se Općinski načelnik da u roku od narednih 15 dana, poduzme sve u okviru svojih ovlaštenja i nadležnosti, da se sanira put ulica Kota i stvore minimalni uvjeti kako bi se njime moglo prometovati.**

Predsjedavajući OV stavio je na izjašnjavanje predloženi zaključak, te nakon izjašnjavanja vijećnika konstatira da je **predloženi Zaključak jednoglasno usvojen**.

4. Predsjedavajući OV upoznao je prisutne da je Općinskom vijeću i Općinskom načelniku upućen dopis od strane Savjeta MZ Dabravine u vezi rasprave i Zaključaka donesenih na sastanku Savjeta MZ Dabravine, održanog 16.09.2011. godine. Sa sadržajem dopisa, predsjedavajući OV upoznao je Vijeće.
Otvorena je rasprava u kojoj su učestvovali vijećnici: Elvir Rožajac, Džemo Kevrić, Kenan Kamenjaš, Ismet Abdulahović, Jasmin Salketić, Dženana Bešić, te predsjedavajući OV Josip Malbašić, pom. načelnika za društvene djelatnosti i BIZ Rusmir Berberović i zamjenica općinskog pravobranioca Elma Brčić, koji su dali odgovore na neka pitanja vijećnika postavljena u raspravi.

Predsjedavajući OV, na osnovu sprovedene rasprave, predložio je slijedeće

Zaključke:

- **Ukoliko građani MZ Dabravine smatraju da je predsjedavajući OV Josip Malbašić prekoračio svoje ovlasti, mogu pokrenuti proceduru za smjenu predsjedavajućeg OV u skladu sa važećim aktima.**
- **Općinsko vijeće Vareš i nadležna Služba uprave će do kraja tekuće godine uraditi propise-akte kojima će se regulirati održavanje izbora u Mjesnim zajednicama općine Vareš i njihova verifikacija, u skladu sa Statutom.**

Predsjedavajući OV stavio je na izjašnjavanje predložene zaključke, te nakon izjašnjavanja vijećnika konstatira da su **predloženi Zaključci jednoglasno usvojeni.**

5. Vijećnik Ivan Lučić ponovo je podsjetio prisutne na donesenu Odluku o vrijednosti boda komunalne naknade i financiranju komunalne djelatnosti, odnosno na Zaključak OV kojim su Rješenja za plaćanje komunalne naknade, obveznicima trebala biti podijeljena do kraja I kvartala tekuće godine. To nije ispoštovano i ponovo predlaže da Vijeće donese zaključak da se ubrza uručenje Rješenja za plaćanje komunalne naknade i da svi građani budu ravnopravni, odnosno da svi dobiju rješenja bez obzira da li žive u individualnim stambenim objektima ili ne žive, jer naknadu moraju platiti svi i da se odmah pristupi ozbiljnije u podijeli rješenja. Otvorena je rasprava u kojoj su učestvovali vijećnici: Jelena Zlobec, Ivan Lučić, Mato Pavić, Elvir Rožajac i predsjedavajući OV Josip Malbašić.

Predsjedavajući OV, na osnovu sprovedene rasprave, predložio je slijedeći

Zaključak:

- **Pristupiti da se realizira Zaključak Vijeća u vezi podjele Rješenja za plaćanje komunalne naknade, da se ubrza podjela Rješenja svim obveznicima naknade i da se poštuje Odluka Vijeća, a da se u međuvremenu razmatra pitanje vrijednosti boda za komunalnu naknadu u 2012. godini.**

Predsjedavajući OV stavio je na izjašnjavanje predloženi zaključak, te nakon izjašnjavanja vijećnika konstatira da je sa **14 glasova „ZA“ 1 glasom „PROTIV“ i 3 „SUZDRŽANA „ glasa predloženi Zaključak usvojen.**

Sjednica je završena u 13,00 sati i 40 minuta.

T A J N I K

Leon Pavlović

ZAPISNIČAR

Azra Ibrahimović

PREDSJEDAVALAČI

Josip Malbašić